

06 NOV 1998

Ghani-Singapura

PERSEFAHAMAN MALAYSIA-SINGAPURA PETANDA BAIK, KATA GHANI

JOHOR BAHRU, 6 Nov (Bernama) -- Persefahaman yang dicapai antara Perdana Menteri Datuk Seri Dr Mahathir Mohamad dan rakan sejawatannya di Singapura, Goh Chok Tong semalam, merupakan petanda baik dalam konteks hubungan dua hala.

Menteri Besar Johor Datuk Abdul Ghani Othman berkata perkembangan itu adalah baik bagi Malaysia dan Singapura untuk sama-sama menghadapi krisis ekonomi sekarang.

Ia juga adalah contoh yang baik dalam konteks Asean, kata beliau kepada pemberita di sini hari ini.

Abdul Ghani berkata kerajaan negeri Johor mengalu-alukan persefahaman yang dicapai oleh kedua-dua pemimpin itu dan ini bermakna perkara-perkara yang tertangguh seperti soal pembekalan air mentah ke republik itu boleh diselesaikan.

"Kerajaan Johor percaya berikutan persefahaman antara Dr Mahathir dan Goh, media Singapura akan bersifat lebih positif untuk membawa perkara-perkara yang membawa kebaikan bersama," katanya.

Abdul Ghani berharap media republik itu dapat membezakan dengan amalan mereka sebelum ini yang mengungkit perkara-perkara tertentu serta menyentuh sentimen rakyat sehingga melebarkan jurang hubungan antara kedua-dua negara.

Berikutan pertemuan singkat Dr Mahathir dan Goh di Sepang, semalam, Malaysia dan Singapura mencapai kata sepakat untuk bersama-sama berusaha ke arah memperbaiki hubungan dua hala serta mengetepikan apa jua perselisihan.

Hubungan Malaysia-Singapura terjejas berikutan beberapa isu antaranya soal pemindahan Pusat Kastam, Imigresen dan Kuarantin (KIK) Malaysia dari Tanjong Pagar ke Woodlands, pencerobohan ruang udara oleh pesawat tentera republik itu dan kenyataan Menteri Kanan Lee Kuan Yew dalam bukunya yang telah menyinggung para pemimpin Malaysia.

-- BERNAMA

MKO NMO